

ECONOMÍA, EMPREGO E INDUSTRIA AMPLÍA O PRAZO DE SOLICITUDE DO PROGRAMA CONECTA PEME ATA O 9 DE FEBREIRO

- ***As empresas galegas contarán con 15 días hábiles adicionais para presentar os seus proxectos ao programa específico da Xunta de apoio á innovación dirixido a pemes***
- ***Esta terceira edición do programa mobilizará máis de 40 millóns de euros a través de máis de 50 proxectos de innovación de alto impacto liderados por cerca de 200 pequenas e medianas empresas galegas***

Santiago, 20 de xaneiro de 2016.- As pequenas e medianas empresas galegas contarán con 15 días hábiles adicionais para presentar as súas solicitudes ao Conecta Peme 3. A Consellería de Economía, Emprego e Industria vén de ampliar ata o 9 de febreiro o prazo de aceptación de proxectos no marco do seu programa específico de apoio á innovación dirixido ás pemes.

Esta terceira edición do Conecta Peme mobilizará máis de 40 millóns de euros a través dun investimento público de 25 millóns. A Xunta prevé impulsar máis de 50 proxectos de innovación de alto impacto promovidos por consorcios empresariais formados por preto de 200 pemes galegas, coa perspectiva de que a maior parte deles implique tamén a colaboración de centros tecnolóxicos e de investigación galegos.

A presente convocatoria do Conecta Peme inclúe 20 medidas de simplificación e flexibilización administrativa, atendendo así á demanda das propias empresas de reducir os esforzos destinados aos procesos burocráticos. Desde o punto de vista estratéxico, as principais novidades desta terceira edición do programa son o aliñamento coas prioridades temáticas establecidas na Estratexia de Especialización Intelixente de Galicia (RIS3) e o apoio por primeira vez a proxectos de innovación en organización e mellora de procesos. Isto último responde ao aliñamento coa Axenda de Competitividade Galicia-Industria 4.0.

O Conecta Peme busca impulsar a xeración de solucións innovadoras a necesidades estratéxicas para Galicia, que ao tempo sexan competitivas no mercado global; mobilizar capital privado con destino á innovación; e fomentar a unión de capacidades científico-tecnolóxicas procedentes das esferas pública e privada.

As axudas incentivan a innovación aberta para a mellora competitiva das pemes, mediante o apoio a proxectos en colaboración entre un mínimo de dúas e un máximo de seis empresas. Nesta edición incorpórase a posibilidade de incluír no consorcio a unha gran empresa, sempre que non supere a execución do 25% do total do orzamento, e unha consideración especial para os proxectos que impliquen a contratación de centros tecnolóxicos e de investigación galegos. Os proxectos terán que contar cun orzamento de entre 500.000 euros e 1,5 millóns e as axudas públicas poderán cubrir ata o 80% do total.

**SAÚDOS,
GABINETE DE COMUNICACIÓN DA CONSELLERÍA DE ECONOMÍA, EMPREGO E
INDUSTRIA**